

西  
堂  
詩  
集

序

尤子悔菴受史職五年奉假歸輯其詩集成命之曰詩  
京以屬序余讀之喟然而歎竊有感於風人之說也夫  
三百篇之取乎風也不以其時乎時當春夏入於陽和  
煦溫而被潤人習而安之迨夫秋冬拂崇岡振長條其  
爲聲也噫嘻以怒號而人之遇之者亦爲翫戲而改聽  
凡天下之有聲者類不能無情此人所以相爲感而發  
之於詩也子夏之序詩曰發於情情非作詩之本乎詩  
必有所感而後以成聲聲之不因乎感者其詩爲無情  
無情則無本故詩之有正風有變風皆其時爲之非君

子之得已也悔菴擅詩名者四十年當其少時遽舉  
厲以邁往之氣見之於詩藻采紛披一無稀章繪句之  
陋習迄於今往往信手疾書遂成篇什而渾脫瀏灑儼  
然與唐大小杜相上下其西堂雜組奔走海內先受知  
於

世祖章皇帝今復爲

皇上所簡擢而其子慧珠又官庶常父子先後同館職  
國家之恩遇所以酬其夙昔者亦至矣以是爲詩宜乎  
多歡愉少愁苦而悔菴不之然者何歟余怪焉又以爲  
得情之正耳五年中雖慧珠得貴顯而其骨肉摧殘忽

已踰半拊昔憑今瞿然影隻哀逝之餘而俯仰咨嗟又有不止於是者念少與天下賢豪橫襟獵纓互爲雄長今度尋衰白更遭多故徒以一身偃僂罄折勞勞於天壤之內而又何樂哉凡所爲詩羽調商音取次側出其亦有不能已者在也余與悔菴少相善同官以來珥筆追隨嘗以靜默爲規趨蕭閒爲慰藉故交好以加密嗟嗟悔菴固天下情至之人自命於千古者也而一時之苑枯得喪何足具論哉比者余與悔菴矢言旦旦自以

蒙

國厚恩無所報稱將共乞假滄江相與學道窮年以遂

其初志而悔菴乃先余去余所以序其詩爲之三歎息  
而有餘愧也

康熙癸亥六月旣望太倉年春弟黃與堅誤

于京集卷一

哀絃集另刻

長洲尤 侗

自戊午六月至己未二月止共詩九十首

赴 召言懷四首

天子求賢下制書羣臣薦表滿公車  
自多冠帶填金馬何意弓旌賁草廬  
對策豈能追賈董上言曷敢比嚴徐  
入山未遠長安近不許休官賦遂初

解組歸田二十年煙霞痼疾久高眠  
從無妖夢乘車蓋偶有虛名掛簡編  
瓦礫誤收鐵網內漁樵重拜玉堦前  
蕭蕭白髮登程去回首青山意惘然

武帝珠襦杳不聞上林曾賞氣凌雲  
慚無犬馬酬今日  
每望園陵憶  
舊君當軸尚承南海  
詔旁觀休誦北

山文此身已作煙波叟  
應召惟堪獻野芹

世祖幸南海子召徐狀元元文問何履歷

出門心事總茫茫  
襖被誰人與辦裝  
彭澤田園將廢棄  
杜陵妻子獨悲涼  
孤舟偃仰方三伏  
千里攜持祇十行  
社櫟終非廊廟用  
應憐衰野放還鄉

熱

生平嘲熱客何意及潛夫  
白鳥方司夜赤鳥正載塗  
聞吟團扇曲思對北風圖  
可惜扁舟在無從汎五湖

舟阻京口

紅日燒空行路難  
長年悶坐只如閒  
袍船截住橫江口  
便是南徐第一關

揚州寓寺立秋

纔到維揚已倦遊  
暫棲蕭寺此登樓  
黃河決水上田涸  
赤日當天大火流  
南下王師方牧馬  
北征客子且停舟  
驟聞秋至登然喜  
奈入離心變作愁

高郵同旣庭夜話

秦郵景物昔年殊  
浩淼難尋篔簹社  
湖蓮葉不歌  
持櫂女  
柳條却走築堤夫  
風高尚詫蛟龍鬪  
日落時聞雁鶩呼



幸有故人同夜話暫持斗酒慰羈孤

碧霞元君祠

在寶應稱睡公娘娘

泰山分祀向江東忽夢熊羆作睡公霧髻煙鬟趨婦女  
瑤環瑜珥弄兒童金爐夜裊沉香火寶殿晨開船趁風  
遙想靈旗遊幸處天妃咫尺有行宮

淮上

淮水湯湯憂若何上流日夜納黃河當年鐘鼓三洲少  
此地汙泥數斗多牛喘田家聞叱歎鷄鳴關吏苦譏訶  
桂枝未遂山中約惆悵王孫招隱歌

黃河二首

千里黃河一望中，開船喜借大王風。  
片帆忽過桃源驛，夾岸新成瓠子宮。  
祇爲漕儲需轉運，頻勞版築問司空。  
籌河賈讓真無策，却憶吾鄉徐武功。

河源星宿出崑崙，九折南來日月吞。  
滾滾洪流歸六掃，芒芒禹跡在三門。  
地形險過黃牛峽，風利驚看白馬奔。  
縱使乘槎上天漢，何如濠濮樂蒙園。

病

自揣迂疎無宦情，未能免俗敢求名。  
微官久棄還初服，垂老翻勞賦遠行。  
千里風濤驚噩夢，百年霜露困浮生。  
朝來病骨支離甚，何用文園臥長卿。

故城夜泊

早起開新闢黃昏宿故城無邊秋草色不斷夜濤聲水  
國空三戶天涯獨五更明朝看青鏡白雪滿頭生

河上老翁歎

黃河灘頭獨家住老翁零丁攜老嫗兒無襦袴女無牀  
糞土之牆蔽風雨本因避水到此居水來又走高墩去  
遙指河濱千頃田滔滔今已成大川可憐廬舍遭漂沒  
鷄犬隱約波濤間河身橫溢數百里但聞鬼哭無人煙  
隄堰築成旋潰決朝廷空費水衡錢田糧雖免丁役  
在柳條竹索相牽連老翁家中無一物每食不飽且安

眠嗚呼老翁勿歎息明朝我亦愁行船

舟行絕句三首

黃河水沒萬家田田裏田田出白蓮  
千顆蓮蓬百丈藕採來喜不納官錢

揚州划子掛蒲帆棹入荷花百尺潭  
潭上垂楊千萬樹斷腸風景似江南

錦鱗潑潑滿漕渠惆悵難傳尺素書  
江東不少鱸魚賣却向黃河買鯉魚

濟上七夕二首

離家一月初弦未及天孫隔一年  
烏鵲橋邊水幾許

今宵我亦聞河邊

迢迢銀漢露華生  
夢繞江南千里程  
夜半歸來河畔草  
秋風兩岸怨蛩聲

南旺分水

永樂九年潘叔正築壩東平州戴村遏汶水無東流至南旺而中分

此處運河脊平分  
汶水中決排奪禹蹟  
巖巖顯神功  
地割魚龍宅  
天旋牛馬風  
南船人喜劇  
一往看飛蓬

寄家信四首

出門殊惘惘  
婦病已經時  
藥餌難將息  
錢糧費主持  
竟成垂老別  
不盡遠相思  
千里綿綿道  
如何寫一辭

家貧亦何有生性  
奈多愁門戶艱  
難盡晨昏題  
勉求年

光催蟋蟀世態變蟬蛸我已先看破潺湲河水流  
大兒隨我去小子獨承家未熟謀生計休空度歲華文  
章應日上車馬且天涯汝發金陵道遙看北斗斜  
娛老無佳味含飴喜弄孫已知親筆墨未解問寒溫送  
別猶臨水歸來應候門康成書帶在好與小同論

臨清阻風

二十年前曾阻風清源漂泊此時同重來祇覺鬚眉白  
獨坐翻嫌燈火紅秋氣漸深聞落葉鄉思轉劇訴鳴蟲  
人生百事嘗相左水自西流風自東  
戊戌臨清阻風詩  
云水順卽風逆盈  
虛理亦然

德州同旣庭坐月

今夜德州月故人欣共看  
知心時俗少行役暮年難  
白露愁砧杵秋風憶釣竿  
漫誇西域獸萬里入長安

時西域有貢御船

滄州漫興二首

驛馬臨三戍征車歷九秋

戊戌八月戊申九月  
戊午七月凡三入都

昨非已

難問此去復何求  
世事涼風起浮名逝水流  
天涯勞極

目試上望京樓

野性耽高臥隨時作遠遊  
吳山青草暮漢苑白雲秋  
天末驚飛雁沙灘羨睡鷗  
平生浩蕩意喜說滄洲

蟋蟀

舟中一蟋蟀竟夜作秋聲能令征夫怨寧惟懶婦驚水  
程隨萬里寒信急三更何似涼堦畔微吟玉露清

雨夜候既庭舟不至鄰舟有吹笛而歌者二首

風雨瀟瀟打布篷孤舟相失玉河中天南一望雲千里  
嘹唳三更叫斷鴻

誰家吹笛按吳歌聽罷淒然喚奈何此夜青衫知更濕  
流河驛畔雨聲多

上大司馬宛平王公

先皇昔臨白玉堂觀草首數瑯琊王銀杏曉騎彩雲動



金蓮夜歸明月光日昃每饌蓬池鱸天寒特賜雕錦裳  
學士少年號內相禁中頗牧兼班張爾時家尊大宗伯  
一門鳳閣開青箱海內爭推大小許如仰北斗麗文昌  
放勳徂落重華出疇咨岳牧賡明良老臣懸車日月下  
公乃高步登巖廊洊陟尚書司喉舌進掌邦政平封疆  
國家宴安啓萌蘖蛾賊槃牙跳三方至尊宵衣戒司  
馬穀乃甲冑峙糗糧公當大敵色不動折衝樽俎掃欃  
槍祇今小醜就剪滅馬上露布奏御牀天顏深喜武  
功定投戈講藝求縹緗潤色鴻業資禮樂秩宗黼黻夔  
宮商詔命諸臣各搜薦朕共試哉惟才良山公啓事

正絡繹金馬獻賦來相將僕也江湖散人耳奈何濫玷  
公車章却憶少爲邊寒吏曾厠扶風弟子行忝公世講  
望顏色邯鄲天人歎非常生平著書有雜組公攜一冊  
呈 先皇 天子飄飄凌雲氣比之子虛與長楊顧問  
及門重太息舉似高座加揄揚人生遭遇真有命九重  
賞鑒空茫茫 先皇晏駕僕亦老灌園抱甕臥柴桑翹  
首龍門悵延竚汙泥豈有雲霄望忽聞徵書下退谷驚  
破泉石鉞膏肓捧檄咨且旣不可賣山難辦彙中裝十  
年不上長安道顧視白髮增慚惶明公薦賢誠爲國恐  
非桃李羞門牆願謁承明乞身去白衣山人放還鄉優

游太平歌雅頌待公坐論調陰陽僕也感恩知已何足  
道於乎 先皇思不忘

賀孫愷似高麗使回秋捷

萬里邊關疋馬行 鞬裝箭箠一書生  
親銜 天命馳周道 博採風謠到漢城  
白殫紙堅宜彩筆 滿花席軟伴桃笙  
歸來奏事金華殿 笑換麻衣聽鹿鳴

送沈次雪令嘉善

薊門秋色起雙鳧 仙吏輕舟進鶴湖  
衣錦家鄉無百里 下車風俗卽三吳  
絃歌子弟懷詩卷 山水衙門入画图  
知爾政成還坐嘯 好傳八咏到京都

同舉諸公公讌

芙蓉闕下集簪裾四海朋來慰索居烏有客方借子墨  
楊雄文或似相如解衣共醉新豐酒傾蓋相逢下澤車  
寄語靈臺南太史德星可紀漢京書

挽葉元禮舍人三首

昔日曾登午夢堂一門珠樹盡琳琅最憐文若年方少  
何意僧彌命不長白玉塵談空謝客紫薇花影竟埋香  
招魂誰送吳江去嘹唳征鴻唳數行

東華踏遍軟紅塵眼看秋風瘞壁人蝴蝶夢中燕市月  
杜鵑聲裏曲江春刀鏤有約勞思婦劍缺無家泣老親

十載浮名成底用一棺道路已終身

漫說凌雲薦長卿哀江南殉庾蘭成

元禮曾注哀江南賦

水萍踪

跡恒千里朝茵春秋便一生空贈紙錢懸墓樹祇留官級寫銘旌修文天上尋常事莫倚才華傲玉京

挽侯記原二首

憶昔虞山會東風拂水時淒涼點鬼簿惆悵紀遊詩家

世三年血文章兩鬢絲五侯今已矣地下可連枝

子謙記原

在辛巳春虞山臨社坐中如黃韞生夏啓霖錢方明湯卿謀章素文及研德皆在矣

膠水停舟日披襟向秬園芙蓉方滿澤明月正當門招

隱空埋骨遊仙不返竟燕臺遙酒淚祇共阿戎論

乙卯六月

予過秬園記原少曾遇仙阿戎謂大年也

挽杜九高令子香武三首

香爲小字雪爲姿黃土生理玉樹枝聞說雙瞳剪秋水  
教人憶殺杜唐兒

鍾情我輩得無同手把遺文泣阿翁桑樹金鑲好留在  
冥中定放顧非能

孤鴻啼罷斷猿啼旅舍寒冰落日低纔寫挽歌先下淚  
難言我自哭亡妻

予方悼亡

題王阮亭侍讀悼亡詩後三首

彈絕哀絃曲未終相憐相泣病相同吾家雖有閨房秀

那及王家林下風

燕山蜀道久驅馳回首紅橋飛柳絲  
一自寶釵敲斷後更無人念衍波詞

相如今已賦凌雲侍女衣香鎮夜薰  
何似鸛裘貫酒日春風鬢影看文君

口號四首

四更鷄叫五更鐘正在沉酣渴睡中  
街上傳呼聲已遍長安門外火城紅

丹墀紫閣極崔嵬駟馬高車亦壯哉  
却喜夢中都不見閒遊仍到故園來

朝朝騎馬傍朱門  
夜夜張燈陪酒尊  
只此長安公事了  
爲誰寒冷爲誰溫

數米量煤并買漿  
借人車馬賃人房  
點金辟穀俱無術  
不信長安是首陽

龍石樓金陵納姬四首

從來名士悅傾城  
十四樓中賦定情  
愛抱瑤琴弄三峽  
織綃娘子是前生

洞庭公子水晶宮  
新結同心十二峰  
朝看行雲暮行雨  
始知神女會乘龍

舊夢揚州后土祠  
十年解珮訝來遲  
天風吹下瓊花種



開作人間連理枝

石樓感夢曾製瓊花夢樂府

郎上京華伴紫薇  
青溪桃葉妾依依  
金門早獻長楊賦  
籠取天香罩画衣

萬柳堂二十八韻呈相國益都公

昔日廉希憲當今馮野王  
兩賢雖異世萬柳若同堂  
青海家風盛黃扉相業光  
平章甲觀第小築午橋莊  
丘壑藏公府山林近  
帝鄉東華塵不到西苑鬱相望  
土厚龍蛇伏天空鴻鵠翔  
楚泥因得水壘塊便成岡  
怪石支幽洞繁花繞曲廊  
層臺叢古木側徑倚修篁  
細草眠麋鹿高梧覽鳳凰  
最憐彭澤樹移出永豐坊  
初染鴉頭綠

深披鷺羽黃依依垂手舞裊裊折腰粧張緒風流遠王  
恭容止芳將軍營幾列丞相宅周行堪矯平泉汰差強  
獨樂荒陂池聊淡蕩風月自蒼茫休沐閒携杖招賢共  
舉觴採蕘原不禁看竹亦何妨作達誠高致推恩卽道  
場噢咻尋隘巷乳哺及空桑釣絕魚鰕餌籠餘鳥雀糧  
生男應字賈銜玉定歸楊心寄煙霞外身依日月旁誦  
詩瞻綠簣布政茂甘棠方獻南山壽宜承北斗漿今朝  
占柳宿髣髴麗文昌

賜廩恭紀二十八韻

天子坐明堂羣工滿廟廊周官升俊秀漢室召賢良禁

藥傳 綸詔公車奏薦章三河推賈誼四府舉辛湯符  
檄徵空谷弓旌下曲鄉鳧鷖皆跳躍騏驎並騰驤敢附  
夔龍侶聊隨鷓鷯行擔簦趨上苑簪筆待長楊臣志思  
陳策 君恩問辦裝預憂旅斧乏早念客衣涼 特賜  
金三品兼支粟一囊朱提分九府白粲出千倉頓起蓬  
蒿色頻充藜藿腸縹緗如潤澤燈火覺輝光寒可添薪  
炭愁還買酒漿上書謹北闕索米笑東方鄰比從誇示  
朝班願拜颺遙瞻 天駟遠正策玉鞭長翠輦巡郊數  
黃裘冒雪霜 九重猶減膳萬戶亟輸糧宰相堂餐罷  
將軍飛輓忙何緣開武庫遂爾濫文場小器同筐筥庸

材類批糠匪頒誠慶幸素食轉慚惶努力摘花管齊聲  
頌柏梁碧霄常切近丹地共廻翔脂藥銀罌裏金錢錦  
瑟旁昇平樂未艾燕衍永難忘

送宋牧仲權使贛州

帝京雲物覩陽回賦別登臨宋玉才征棹正隨寒雁去  
放衙應及早梅開金娥昇處留粧闕木客吟成乞酒杯  
身在江湖心魏闕青春還上鬱孤臺

呂真人印月軒詩二首

獨駕天風四海行鸞旌偶駐鄭州城高軒聳出西山爽  
長劔飛來北斗橫年遠漫留延命訣夜深常聽步虛聲

嗟予尚帶邯鄲夢何日仙遊夢玉京

翹首神都八景輿仙人自昔好樓居赤松子採山中藥  
黃石公傳圯上書三醉岳陽觀止矣再遊梁苑異何如  
世人欲問朝元路一點水輪照碧虛

春朝應右局教和羨門韻

絳節霓旌下紫壇真言疑贈碧霞丹側身天地多荆棘  
矯首雲霄乏羽翰殘醉尚沾百末酒新春還薦五辛盤  
羈人欲乞忘憂訣覓取心來與汝安

玉皇降辰應教和前韻

今皇郊祀肅園壇臣輩欣逢恩詔丹五色雲霞開鳳殿

九天風雨駕龍翰遙聞玉女搖仙佩願學金人捧露盤  
從此旦明凜帝謂餘生豈敢再偷安

戊午除夕限韻四首

凡限韻者皆仙此所限韻與  
羨門訪濂同作後傳此

今夕何年歲忽除光陰急似轉輪車祇應因舍閒扶杖  
何事王門輕曳裾獨抱窮愁常默默相逢豪貴半居居  
不堪客路三千里腸斷哀鴻尺素書

時珍魁奔喪南歸

歲已云除服未除顛毛蕭颯暮年餘靡家靡室因何故  
爲圃爲農總不如黃土傷心空入夢青天搔首欲憑虛  
風塵自恨回頭晚寡過猶然愧衛蘧

春風稍稍拂堦除可歎家無擔石儲意氣極天增潦倒

文章慢世任軒渠幾年苦海浮沉我何處  
名山俎豆予賓戲客嘲都謝却漫將問答  
混樵漁

齋心晏坐俗緣除思逐東風返草廬  
每望辰居依太極偶從夜夢入方諸  
天邊不乏蓬幽鳥地下難逢錦水魚  
幸有故鄉知已在樽前暫遣旅懷舒

己未元旦限韻四首

矐矐閭闔啓三元翹首東方初出暎  
十載歸田追粟里一朝獻賦擬文園  
倚天每欲憑長劍行路寧當局短轅  
買得彩絲空五色不知何處繡平原

班朝太史紀春元九陌三條車馬喧  
已見賡歌登雅頌

猶聞戰伐動乾坤青陽正命蒼龍駕丹地何勞白鶴軒  
閱盡風塵徒膠擾不如谿谷植靈根

太平玉燭望昇元律管初吹寒谷暄風俗任從時世改  
詩書獨見古人存壺中日月常憂短皮裏春秋亦覺繁  
鸚鵡鷓鴣君莫賦逍遙我欲賦鵬鯤

凌晨齋祓默朝元呼吸靈風達九門萬象盡從青道出  
衆星遙拱紫微尊人遊海上蓬萊宅家在江南楊柳村  
但得扁舟垂釣去鑑湖一曲是君恩

上元卽事限韻四首

青皇乍指斗杓東 帝里春光此夕同花信欲催潑火



雨鳥聲先弄試燈風上元節慶留黃籙太乙祠開降紫  
宮自有辦香供靜課九遠莫問萬星紅

士女燈毬遍踏歌長安東去是渾河衰年賸有餘春在  
羈客其如良夜何漫望長楊搗賦草遙瞻太液漾文波  
朝聞 天子親祈穀又看千門翠輦過

十二街頭画鼓鳴鬧蛾爭趁月華明金門未見魚龍舞  
蕙帳空教猿鶴驚竹葉行杯憐舊雨梅花出戶喜新晴  
浮沉孰似歸休是願借青山作主盟

寶燭三條經兩函迎神不比紫姑衫仙人自曳青藜杖  
使者頻傳碧玉緘華屋競看鰲綵結故園空想燕泥銜

何當採藥尋真去長嘯同登大若巖

憶江南早梅限韻

春信江城報早梅南枝已發北枝催千林香影隨風散  
一夜寒光帶雪開驛使相逢誰載酒羈人遠望獨登臺  
高樓且莫吹長笛好待孤山處士回

旅夜聞春雁聲限韻

衡陽歸信在春先又逐東風向朔天錦字獨啣千里月  
蘆花猶帶五湖煙頻催短漏青門畔似和哀笳紫塞邊  
正是離人聽孤唳十三絃柱自凄然

皇太子大慶祭告頒赦二十韻

北極啓天閭 東宮應少陽  
軒圖虹渚繞 殿土燕謀將  
初旭臨璇室 前星出画堂  
朝三稱世子 儲貳體元良  
寶冊垂高殿 金衣錫御床  
鼎凝主器重 蒙養聖功彰  
玉葉初承寵 瑤花遂發祥  
虞歌月復旦 漢樂日重光  
甲觀吹春瑄 椒闈獻壽觴  
思文昭下武 太任媚周姜  
嬪御同嘉慶 疑丞喜拜颺  
貽謀本列祖 降福自維皇  
清廟崇牙羽 郊壇薦飶香  
山川來擁護 社稷祚靈長  
勞賜先三事 恩施及四方  
轡軒周海甸 綸綍遍江鄉  
解網空圍土 招弓問澗岡  
龍樓瞻踴躍 鳳闕想翱翔  
出閣詩書近 臨雍鐘鼓鏘  
勳華一家在 千載詠皇唐

典引皇哉唐哉

賦得宸章類河漢二十韻

仰觀雲漢倬天章追琢光華在我 王祇識 君心卽  
太極應知 帝座有文昌圖書河洛呈龍馬雅頌岐山  
鳴鳳凰睿哲本從 元后亶嘉言共覩 聖謨彰宮中  
乙夜書千卷殿上宸綸詔十行萬乘轡龍真熠燿九霄  
珠玉自琳瑯縹緗舊版充松棟絃管新聲起栢梁豐沛  
歌風開兩漢昆池揮翰邁三唐琉璃硯匣供香案玳瑁  
牙籤疊 御牀每汎樓船謳太液時乘獵騎賦長楊廻  
鑿南苑雕銀燭駐蹕西山背錦囊視草常聞題虎觀散  
齋還見詠芝房臨摹金錯鈎飛白點染霞箋映硬黃墨

榜淋漓多賞賜形墀踴躍並賡颺驚聞仙籟吹長樂疑  
捧宮花出未央周誥商盤追渾噩吳歛楚奏聽低昂湘  
東空笑貽三管織女猶慚報七襄五色景卿爭爛縵雙  
丸沐浴等輝煌寶鷄獻瑞棲秦時馴雉疑蠶貢越裳奎  
璧泰階誠有象璿璣鼎曆洵無疆

湖南凱歌四首

於鑠 王師奮四征 天威早見服蠻荆江山新變旌  
旗色風雨爭馳金鼓聲青草湖邊萬馬渡黃陵廟口五  
花營前徒士女壺漿滿願挽銀河洗甲兵

鳳闕朝聞露布傳將軍雨地下樓船雕弓已破瀟湘竹

羽扇還麾雲夢煙，猘自當平六月鬼。方何俟克三年，  
征夫不用歌楊柳。爲駕檀車待勞還。

幾載飛芻轉舳艫，今朝鐵騎遂長驅。二矛漸次除三孽，  
一矢何難殪獨夫。夜雪方深猶入蔡，東風驟發足吞吳。  
五溪已息南人反，寫入明堂王會圖。

天家重譯並來王，蠻觸如何大夜郎。螳臂豈能當斧鉞，  
旄頭先已掃欃槍。三巴鳥道成京觀，六詔盤江弔戰場。  
試聽饒歌朱鷺曲，兩階干羽盡文章。

花朝前一日曹正子招諸同人雅集二首

春色初分爛熳晴，草堂裙屐漫將迎。羈人欲折江南柳，

好友如逢陌上鶯，共喜面談留翰墨。獨憐肺病斷杯鐺，  
憑君擊鼓催花發。却恨花辰明日生。

公子南皮正少年，芙蓉車蓋集羣賢。卽看勝事猶前日，  
何意佳人至各天。四座雅堪登画障，一差足代歌絃。  
高粱河畔多青草，踏遍春風總惘然。

月夜有懷

春月正闌干，春風尚半寒。江南芳草綠，客夢滿長安。  
露下花香濕，烏啼玉漏殘。徘徊羅帳外，應照淚痕乾。

寒食登毘盧閣二首

獨上毘盧閣，蒼然見帝都。東風作寒食，百草滿平蕪。

土雨春衫濕江鴻客淚孤低迷千里目惆悵白雲無

苦憶松陰下攜樽共故人婆娑忘歲月荏苒老風塵黃

土皆長夜青山又一春不堪騎馬地夢斷五湖濱

壬辰清明

日宋荔裳攜酒同施爾恭陸處實小飲松下今二子皆已亡矣

爲梁司農挽吳夫人四首

天上還歸吳彩鸞蘅蕪一夢影珊珊繡襦甲帳今何在

畫閣春風起暮寒

梁家廡案幾年齊不見春山睂黛低暮雨瀟瀟人去後

落花寒食子規啼

陌上花開人不歸舊巢雙燕故飛飛湘君自挽夫人去



望斷黃陵苦竹稀

夫人姊先歸司農早亡

蕉林書屋錦衾孤玉雪嬌兒泣  
回圖莫援瑤琴彈別鶴  
江南客老白頭烏

于京集卷二

長洲尤 洞謨

自巳未三月至十月止共詩八十八首

三月朔日太和殿

御試 賜飯體仁閣下恭紀二律

聖主垂衣雅好文徵書早染 御爐熏九天龍鳳飛千  
尺萬國鷓鴣集幾羣綵筆擬從前席獻銅羹先向大庖  
分自憐風雨蓬茅下白首重瞻五色雲

玉輅朝來出紫宸親題寶墨十行新上林正聽鳴黃鳥  
內殿同看對白麟春草卽今招隱士野苹自昔燕嘉賓

此身願得如龍馬躬負圖書獻 聖人

御試省耕詩二十韻

青鳥當司啓蒼龍乘載陽土膏開徑術木正迓勾芒元  
日初祈穀先農已獻祥三推參保介五種出倉箱 聖

德追躬稼 深宮思省方 翠華巡綺陌 鳳蓋轉蘭

塘社鼓千村急茅絢百室忙鳴鳩拂其羽戴勝降于桑  
廡廡周原茂昫昫禹甸長隴頭陳榷柎谷口下牛羊方  
聽甌篋祝因歌芟柞章汎舟莒葉渚駐馬杏花莊出峻  
幽吹樂 曾孫旨否嘗旌旗迴細草劔佩繞垂楊靈雨  
隨車至和風夾路翔 賜租連叻畝勞酒遍畿疆馴雉

依苗黍哀鴻飽稻梁  
盈寧歡婦子遊豫頌  
君王豐歲  
多高廩邦家有饒香  
佇看  
鸞輅返共進萬年觴

十八日

萬壽節

憶故園新笋

故園松菊已蕭蕭  
池畔琅玕尚未凋  
春後籜龍長幾尺  
雨中玉版蠹千條  
思攜纖手佳人滑  
笑脫斑衣稚子嬌  
今日天寒無翠袖  
茶煙裊裊爲誰燒

望鄰院海棠

朔地春寒花不飛  
誰家錦樹獨菲菲  
粧成日出勻脂頰  
睡起風前鬪舞衣  
似向東頭窺宋玉  
恰從半面認徐妃

當年曾受梅花聘腸斷江南音信稀

送旣庭南還

同載扁舟同旅羈不堪揮手在臨岐青山有夢眠常穩  
白首無家歸獨遲客舍三年愁失伴君門萬里悵何  
之天涯兄弟分攜苦便似河梁泣別時

述懷四首

家在蘇臺東復東烏頭忽變白頭翁飄零書劍江山外  
寂莫田園風雨中舊夢幾迷桃葉渡新愁還鎖柘梁宮  
皇都此日花如錦爲囑東君休洗紅

捧檄盧龍是極邊挂冠久已賦歸田歌風每望昭陵地

讀曲猶思天寶年  
玉梳珠襦悲杳渺  
蘭臺石室苦流連  
重騎瘦馬長安道  
獨對蒼茫總可憐

十年臥病掩柴荆  
藜杖蒿簪亦遣情  
一別刀頭隔兩地  
幾尋石上話三生  
隨風紙帳遊魂亂  
如雪麻衣涕淚橫  
遠望家山誰寄恨  
暮雲孤雁斷腸聲

獨坐惟堪問影形  
相逢遮莫笑清醒  
空房漸覺顛毛白  
秃筆難教汗簡青  
仙佩偶然來紫府  
瓣香聊爾誦黃庭  
不如早趁天風去  
看寫新宮壁上銘

四月十五日

聖駕禱雨立降喜成二律限韻

願觀昇平大有年井田况在 帝畿邊今朝靈雨零三  
五他日嘉禾取十千膏澤應垂金掌露餘波還瀉水簾  
泉若非闔闔蒼龍駕那得銀河下九天

深宮齋戒念蒼生莫遣南東呼癸庚旱魃敢同石燕舞  
雨師早馭土龍迎隴頭麥浪如雲散陌上花光照水明  
佇聽薰風解愠曲 君王親奏五絃聲

和羨門韻三首

我意泠然寒壑水不堪客舍火雲蒸孤飛苦似離鄉鳥  
獨宿真同退院僧六月漫騎官路馬五更又點早朝燈  
何時解帶投林去一枕松風夢尚能

消磨白髮任光陰欲作燕歌變越吟孤客祇懸千里夢  
一官難繫百年心蘭臺筆閣誰相問蕙帳香殘何處尋  
翹首天邊金馬地可憐鳧鷖自浮沉

浪跡天涯興澗然空餘形影坐相憐無心更獻甘泉賦  
有暇惟吟秋水篇大暑方驕行急雨西山欲暮起長煙  
京華歲月知多少何似羲皇紀小年

送李子德檢討歸養二首

高臥荆山三十年竭來待 詔賦甘泉身依北闕 君  
門下夢繞西京親舍邊抗疏遠辭彤管侍歸田仍賜綵  
衣旋閒居頻向燕臺望闔闔雲深隔九天



都亭把酒送君歸渭水高堂志不違築圃正逢紅稻熟  
扶筇常看白雲飛未酬君命臣猶壯暫解朝班世已  
稀千里萑蕘吳地遠自憐鄉思欲沾衣

立秋日雨窓限韻三首

金風一夜報新秋不住空簷宿雨流便覺炎涼俄頃換  
漫勞形影自相儔故園苦隔關河邈華髮難消歲月悠  
莫聽寒砧動歸思曉霜早已白烏頭

羈縻長安又一秋閉門原不異林丘沒堦積水知深淺  
出岫閒雲任去留征雁浮沉書未到啼螿斷續韻難酬  
何時往問蓬萊渡我意飄然不繫舟

一葉梧桐驚墜秋紅塵猶自滿 皇州齋心只有閒居  
好閱世無如歸去休滄海白鷗原浩蕩叢林黃雀漫惆  
啾丹丘仙羽知何處欲向華胥夢裏求

初秋新晴限韻二首

西風收雨嫩涼初隱几蕭然愛索居黃葉漸于鄉思切  
白雲終與世情疎誰人牆上過村酒鎮日窓前摘野蔬  
只此便堪朝市隱一簾秋色對清虛

烏鵲西飛報曉晴墨池秋水一泓清未能采藥尋三鳥  
聊爾攤書做百城長笛欲催旅雁唳孤燈偏照暗蟲鳴  
星河風景還依舊無奈天涯白髮生

無酒歌

長安客舍何所有，床頭竟無一盃酒。淵明攢眉太白愁，  
旁人歎息我獨否。火雲燒野日炙天，吸水尚苦咽喉燃。  
避暑反爲河朔飲，汗流浹體安能眠。何況臣朔飢欲死，  
樵蘇不爨突無煙。金貂本少換酒物，那得三百青銅錢。  
以此懸壺坐終日，長齋愛作逃禪客。敢云衆醉我獨醒，  
醉固欣然醒亦得。卽今朱門開綺筵，鞞鞞王公前。  
主人之意不在酒，但索冠蓋相周旋。拘攣一刻不可耐，  
平原十日寧流連。合尊促坐待燭滅，又恐世法嗔狂顛。  
不如無酒且高臥，脩然夢不到酒泉。昔人一斗詩百篇。

我酒旣無詩復然長安市上青帘滿易州價高東涑淺  
北平珍珠久已嘗真定太和聊足遣山東紫露勝羊羔  
刁盧之間名素擅吾蘇三白亦可憐麴車糟床不用典  
今來京師大率無指口只張青白眼噫嘻乎雖無酒還  
當歌無酒猶自可無食將奈何不如散髮歸巖阿白雲  
綠樹樂婆娑招我故人同吟哦松江鱸魚山陰鷺嘉蔬  
鮮果臺盤羅醕酎爛醉紅顏酖一斗一石豈足多

蔬食歌

一日食豆粥一日食餽飢雕胡之飯未易炊何況鷺炙  
與鳧臠我本江東一步兵尊羹鹽豉傲羊酪今來雖料

大官錢三百甕，尚難却郢醪。蓬鱸何有哉，日向金門採。  
藜藿東市屠兒宰，豪豬西鄰漁翁網。鯉魚笑問官人，  
何不買搖手。但道必齋如每思，坡公好薄淡。大意欲慳，  
名曰儉。若予非儉，亦非慳。直是無錢無可啗，不知扁米  
糲寧識五侯鯖。海錯何須鱠，鰓尾陸毛豈必猩。猩唇官  
厨脯，腊自狼藉膿脆腐腸喪。我真秋末晚，菘春早韭山  
中旨蓄過八珍。或云柯古有食品，具區菁與夢澤芹。綺  
蔥琅菜仙家膳，胡麻一匕得長生。我笑君言太悠謬，求  
此何殊龍鳳烹。居嘗抱甕南園側，黃蘇白茹皆知名。相  
逢欣然是故物，鹽梅醃醢誰論精。竊祿素餐愧非分，敢

考憲章著食經不知肉味已三月得無蕭韶奏虞廷吁  
嗟乎心齋長自佳口齋偶亦好一年三百六十日一日  
不齋未爲少目覽黃庭經手撚碧捺草清虛日來滓穢  
掃飯蔬飲水樂在中請學爲圃吾將老朝來指動忽自  
驚豈有肥甘慰枯槁安得君門割肉年歸遺緬君同  
一飽

又歌

人有酒肉我獨無無肉莫市酒莫沽有茶當酒蔬當肉  
我口尚在堪歌呼長安貴人富杯汁見我清齋增太息  
但言何不食肉糜瘦盡朱顏多菜色

獨宿歌

考槃碩人山之阿獨寐寤宿言且歌逢此百罹寢無吶  
優哉游哉莫知佗東家貴人紅錦鞵西鄰富翁金盤陀  
鸞衾翠帳鴛鴦窠左擁綠珠右青娥兩頭纖纖肩相摩  
手弄跳脫翻叵羅可憐狂風渡愛河朝走邯鄲暮南柯  
老子平生劇婆娑北窓高臥安樂窩有婦祇堪搔癢疴  
曲肱而枕逸興多榻來京華如蓬科鰥魚無眠涕泗沲  
翻然一覺悟禪和五更三點同剎那主人惺惺却睡魔  
相伴姹女與黃婆琴心三疊舞佻佻有時嚶語自吟哦  
華胥千年瞬息過莊生化蝶我化蛾蕉鹿芻狗爭么麼

巫山雲雨洛川波豈若飛夢歸松蘿却愁明朝鳴玉珂  
披衣起問夜如何

七夕羨門孚公過訪濂寓齋小飲和韻

離居接席少素食把盃稀此夕聊陳果他家正曝衣旅  
懷獨不見秋色送將歸坐聽寒蟲語如催織女機

送葉井叔歸黃州

薊門羈客望銀河忽發驪駒聽楚歌去國不辭千里遠  
調官豈待十年多秋風帆逐湘江轉夜月人從赤壁過  
回首長安猶咫尺相逢躍馬莫蹉跎

中元卽事



銀河斜轉玉繩低秋氣蕭森萬籟齊 天子于時駕白  
駱地官此夜放金鷄焚香並禮上皇詔燃燭重分太乙  
藜又着朝衫騎馬去曉鐘正度鳳樓西

寄徐石兄

先生老矣幸休居裘馬諸君興不如栗里田園堪小隱  
鹿門妻子好相於高眠自有五經笥緩步還當三望車  
應笑故人癡欲絕白頭方校殿中書

都門咏古十二首

軒轅臺

軒后乘六龍崆峒順風請龍髯飛上天地下遺丹鼎我

欲往從之空山雷雨冥

石鼓

石鼓何逢逢千年不聞響惟留太史文斑剝青苔上讀  
之不能終望古獨遐想

黃金臺

賢王久不作高臺空已矣士爲黃金來古今類如此落  
日一樽酒萬里悲風起

黍谷

鄒衍大九州吹律煖寒谷天下多沍陰安得萬竿竹江  
南亦有田黃稗若不熟

樂毅墓

誰弔望諸君白楊吹古墓冤鬼猶首丘不葬邯鄲路流  
涕遺燕書隆中有餘慕

燕市

燕市酒人歌相樂已相泣惜哉刺不成白虹方貫日盍  
緩將軍死留待所借客

北平城

飛將本數奇射石空沒羽不擒碧眼兒乃殺白額虎縱  
遇高皇帝終與噲等伍

樓桑村

大耳一村夫投屨起炎漢入蜀僅下策吞吳亦非算異  
哉讐國論降表原名禪

昔人云備者具也禪者授也言具而授人也

### 張華宅

茂先博物人甘心附賊后空存女史箴不辨南風臭儀  
託比鷓鴣覆巢焉能救

### 賈島峪

人言賈島佛詩才亦粗了攘臂睨郎君得無神韻少  
窈大房山何似浮屠老

### 文丞相祠

柴市死如歸小樓可高臥祠堂草木深至今碧血滄豈

肯乞黃冠再向零丁過

黃冠之言蓋宋史飾詞燕見心史

遼后洗粧樓

蕭娘美可憐十香啣冤死誰歌赤鳳來  
昭陽殉燕子樓  
下春風吹淚滿胭脂水

射雕行贈黃叢山

秋風蕭蕭邊馬壯健兒彎弓向北望  
韃裝袴褶珊瑚鞭  
縱轡直立天山北此時燒野白草焚狐兔  
逃匿空無羣  
惟有凌霄皂雕起青散飄瞥盤浮雲  
將軍喜劇抽繁弱  
一發歛見車輪落何異戰陣擒王回  
鷲鳥累百不如鴉  
束縛倒載紫橐駝道旁爭呼曳落河  
胭脂小婦進酥酒

擊鼓吹笳<sup>音姑</sup>勒勒歌君不見由基矯矢猿啼木更羸虛弦  
下鴻鵠又不見熊渠子飛將軍射虎中石若有神沒金  
飲羽技絕倫叠雙妙手古無亞解道射人當射馬落鵬  
豈獨都尉能亦有江東抱書者黃童國士儒雅儔輕裘  
緩帶足風流胸羅龍豹六韜策手貫熊麋五采侯吾聞  
一丁勝兩石不羨長孫與斛律虎頭燕頤本諸生投筆  
便爲萬人敵請君挽強馳千里出火生風快莫比遼西  
獵得海東青歸到長楊獻天子

秋意十首限韻

秋氣猶餘暑新涼已滿空天高絕塞外木落大江中統

扇初迎月羅衣恰受風坐深心骨爽且莫恨飄蓬

秋聲何處起一夜變新腔木落聞空谷蛩吟到紙窓催  
愁寒杵急被夢曉鐘撞寂莫誰能遣提攜借玉缸

秋色莎庭裏清陰接翠微鴉隨黃葉下雁帶白雲飛烽  
火軍書數飢荒豕信稀山川悲滿目無路送將歸

秋風天末至飄忽繞京都祇見黃埃滿欲題紅葉無小  
山攀桂樹千里憶尊鱸漫學金門隱誰傳安上圖

秋雲微點綴孤映旅人懷出岫亦云偶渡河殊復佳停  
車思玉笛擁髻惜金釵藜藿從吾好非關繡佛齋

秋月不妄照幽居慰沈寥人誰遺琳襟我欲報瓊瑤百

代麒麟閣三生烏鵲橋可憐待漏客白首尚隨朝

秋雨如零露濛濛潤土毛故鄉方苦旱此地獨流膏野  
屋蜚鴻滿邊關戰角高靈臺堪眺望無使 聖躬勞

秋山青未已秋水淡無涯萬徑藤蘿月一溪蘆荻花心  
隨黃鶴遠夢逐碧雲斜更莫搔吟髭朝來霜始華

秋草淒涼甚階前故不生江楓紅未染園柳綠猶繁感  
物羈愁積思家涕淚橫莫過燕市畔重聽楚歌聲

秋鳥輕於剪高飛好避矰城邊皆飲馬臺上正呼鷹老  
病如同谷微官近茂陵三山應不遠願借五雲乘

地震紀異



孟秋日庚申京師地忽動勢若雷電奔聲如刀兵闐夏  
屋化爲泥平原裂成縫上摧縹緲峰下坼清虛洞壓倒  
排牆間夷甫一何衆哀哉大劫臨萬鬼北邙送厥後震  
不止積塊疑播弄聚族欲填街藏身將入甕旅人靡寧  
居驚破華胥夢又聞客星犯日蝕月亦霽天墜豈憂杞  
石隕已書宋方虞西北傾非止東南空吾觀天官書占  
候每奇中陰迫不得升陽伏不能縱土沴無所演原塞  
民乏用是主鼎折凶或云棟撓重蚤蝨地多瘻鑽鑿地  
多痛自古雖有災於今倍增恐天子側席愁羣公滿  
堂哄深宮累詔頒臺省連章控小臣毫無補虛糜大官

俸齋戒一室中敬持寸心供洪範及春秋史箴矇宜誦  
應天不以文勿問義和仲所望君德修欽哉百工共  
庶回上帝威遂息下民訟重覩三階平永享九州貢願  
和日華歌并獻河清頌

中秋焚香望月限韻二首

八月天高秋正中冰輪萬里素光同驚看北極招搖日  
喜對西方闔闔風玉斗漸移鸞珮迴香雲旋繞燭花紅  
長安多少朱門客浮白高歌樂未終

桂魄飛來一半秋廣寒宮闕夢中遊青天尚苦浮雲蔽  
白草還思清露流骨肉飄零悲瑣尾風塵瀕洞看旄頭

求仙欲乞黃金藥只鍊長生莫鍊愁

移寓留別訪濂二首

依棲三百日暫別亦傷神易地如遷國同閩尚卜鄰一  
囊仍是舊四壁却重新傳舍原無定飄搖任此身  
相逢真不厭相去意何如逆旅方艱食清秋自索居感  
時增涕淚學道共圖書久抱尊鱸與同歸有草廬

代古詩三十首

有序

昔江淹擬雜體詩三十首惟陶徵君作庶幾神似古  
別離班婕妤亦爲近之其餘罕有佳者蓋緣前人之  
篇已擅絕調後之效者繼美爲難僕旅居多暇亦代

古人作三十首諸公皆不以能詩名故篇什往往缺焉足以任我性情發其旨趣雖微事考跡彙括生平至於命意遣詞適成其爲鄙人之詩而已自我作古覽者可無譏焉三國六朝名賢尚多而斷於此者亦舉一以槩百也

諸葛孔明亮

述懷

悠悠天運徂炎精忽焉墜干戈起四郊民居無寧歲伊予琅琊人飄泊南陽寄岡下冬良田荷耒向畦暇歸來息草廬抱膝想天際東望梁父高行吟古人意管子倡齊盟樂生返燕地拔身羈旅中勲名照奕世鄙薄託微

尚非敢慕祿位素志苟不諧欣然成獨寐

周公瑾瑜

出師

漢祀日陵夷狐鼠竄荆棘志士懷苦心觸目生感激江  
東雖一隅天險限南北桓桓孫將軍杖節扶王室老瞞  
固奸雄漢相實漢賊楚風旣不競矍矍遽相逼旌旗蔽  
夏口鉦鼓動西塞貔貅百萬師我視同蟣蝨笑彼烏鵲  
飛無枝且奚適長嘯東風高坐看江水赤

荀文若或

從軍

吾家有八龍星聚高陽里少小著膝前遨遊漫自喜如  
何遭槍擗黃巾亂無紀鄉國逝難留軍府獲棲止上公

奮雄姿出車佐天子東討復西征桓文庶齊軌稟命監  
上京帷幄贊營壘願竭尺寸籌努力報知己執節諒不  
移君子慎終始

管幼安寧

避地

嗚呼漢社屋中原成板蕩闕寺亂蕭牆強臣恣狼伉生  
民遭塗炭世變道俱喪子家北海濱如燕巢幕上乘桴  
聊飄搖出關還慨慷遼東雖異域棲託得高尚皂帽傲  
華簪木榻勝武帳晏起難近疎科頭豈真放寄謝當塗  
客旅人幸無恙彼哉龍頭子入宮太無狀

管公明輅

辨命

子方集 卷二  
弱冠觀羣書縱橫考方術誰云天道遠五行如一畫嘗  
從瑯琊遊顛倒座上客但飲酒三升豈問官千石風雨  
既可占飛伏皆能射知人固有餘保身恐不及壬甲並  
已無何以住竟鬼鬼躁與鬼幽諸公復何惜釋策起長  
歎善易不言易

王輔嗣弼 論道

大易首體元老氏貴守中五千六十四聖言將無同太  
極歸無極原始而反終道損學乃益人嗇天始豐希微  
不可詰幾深故能通苟達一致理庶悟衆妙宗有象意  
斯盡多言數或窮莫問河內女豈知河上公

羊叔子祐

遊山

宇宙浩茫茫名山終古在爲問山中人邈焉復千載往  
者不可留來者焉能待當其登眺時觴咏共高會一朝  
成湮沒賢達付感慨咫尺尚如斯何況萬里外撫茲峴  
首丘孤峙漢江界暇日寄興矚丹青儼圖畫相與酌清  
樽聊爾舒緩帶常恐歲月移佳期悵難再昔人亦有言  
冤鬼猶思沛

杜元凱預

注書

壯士競武節通人驚文藝二道雖分馳立身貴齊致從  
軍襄漢間夙抱吞吳志幸藉廊廟謨得遂疆場事微績



紀穹碑願言貽百世雅好左氏癖耽思成釋例聊以針  
膏肓藥彼兩家蔽吾思鄭大夫邢山有遺地君子尚其  
情小人去其利儉德良可師首陽傲斯制功成而不居  
鑿觀在欵器

夏仲御統

沈舟

吾家會稽山清溪弄舴艋偶然採藥還洛濱逢襖飲招  
邀隨水嬉操柂聊進艇初爲鮐鰯躍後作鮪鯨引白魚  
跳船頭風飛雲冥冥扣舷發慕歌百神爭馳騁靈胥駕  
朱旗河女扇芳影咄嗟何上公車騎炫蛟蜃金翠紛駢  
填長嘯四天冷吳兒木石心髣髴水仙隱

王偉元哀

省墓

臯魚泣道旁原仁痛丘墓風木有餘哀何況嬰凶故冤  
哉先司馬一言隕非數抱此不戴警側身豈西顧攀栢  
日長號血淚染枯樹三復蓼莪篇斷絕劬勞句母氏復  
終天平昔聞雷懼奔走兒在斯百身焉能護歲月易遷  
移秋霜變春露路祇懷夙夜心永矣終身慕

荀奉倩祭

悼亡

清川有比鱗華林有連翼如何閨中人婉孌斷傳匹之  
子美而艷天然賦國色粉黛薄不施修儀謝雕飾令德  
豈不芳冶容自難得彩雲易飄揚蕙蘭鮮堅質安得玉

壺水頓令煩疴釋奄忽歸重泉形影一朝失徘徊虛室  
中悠悠百年隔相思空復勞相從庶能卽願爲鴛與鴦  
交交南山側

向子期秀

思舊

駕言京洛旋山陽隱城郭窮巷積寒水斜日虞淵薄悵  
然見舊廬故人竟不作長笛起西鄰哀音動寥廓緬懷  
撫塵游風景宛如昨灌園共呂居偶鋟從嵇學一朝罹  
網羅壯志委溝壑絕交旣放言養生亦虛託惟餘廣陵  
散日影照絃索入世多迷途古今一丘貉願守箕山志  
高棲謝圭爵還攜南華篇觀魚向濠濮

劉伯倫伶

飲酒

天地本遠廬萬物同芻狗吾生也有涯人世亦何有雖  
有身後名不如卽時酒一飲須一斛解醒復五斗千鍾  
與百觚古人真吾友嗚彼縉紳士禮法自結紐處類蟻  
蝨憑出如牛馬走先生方挈榼荷鍾從而後死便埋於  
此活且濡其首瓶罄將如何歸而謀諸婦

阮仲容咸

論樂

人性有哀樂聲音以之傳非假金石鳴鬱暢何由宣朝  
廷作大章中和合自然尺寸苟參差黃鐘徒虛懸吾身  
亦一器得一會其全藝者能窮工達者乃通玄醉醒皆

妙理得意斯忘言

樂彥輔廣

釋理

至言不在煩聖人貴以約性道苟可聞豈必富丘索至者那得去斯理如立卓因想日相乘大夢無先覺自非神明姿膏肓安能藥舉世尚虛無清言行仍濁何爲老易書公然要名爵酒人固矯枉狂飲亦太虐恬憺以自持名教有餘樂

衛叔寶玠

言愁

天道亂無象人命苦不修自非老氏言焉能免百憂伊予故家子結志慕高流生遭陽九厄王室淪哀丘驅車

辭故鄉行邁悵悠悠汎舟大江渚回首望神州千里空  
蕭條禾黍悲宗周南國富名士清談共綢繆常恐蒲柳  
姿零落先凜秋四顧浩茫茫誰能遣離愁歎彼道旁子  
不知我何求

劉真長悵

清談

伯子能撫絃郢人善操斧實理有茗柯索解在阿堵大  
兒許元度小兒王仲祖何足方袁羊庶幾追衛虎瓌瓌  
田舍兒強作爾馨語我登丹陽城南望大江渚保此勝  
東山斯言未堪許吉凶不由人清濁固自取齒牙豈稱  
雄神明貴高舉小人難作緣馬稍空爾舞

周伯仁顛

寄興

人言作僕射不如飲酒樂此中空無物祇可容杯杓三日何必醒五斗未爲薄辟如萬里江一曲有清濁亦如拂天樹寧害羣狐託疑疑斷山姿誰能折圭角慷慨對山河仗節勦元惡勿以沉湎累不忘在溝壑

祖士稚遊

渡江

朝發白石壘駕言涉大江江南鬱城郭江北橫疆場中流湧波濤擢歌聲慨慷悲哉王室燬羣妖亂天常宮闕聚屠各衣冠變魚羊昔我同心友永夜起徬徨壯志感鷄鳴奮袖相低昂揮鞭從此去一舉埽滄荒功成仗節

還大開朱雀航試搥迴馭鼓驚起蛟龍翔

陶士行侃

連覽

大禹惜寸陰君子所無逸我輩中下人曷敢玩時日慨  
自典午頽風塵暗京國江東僅偏安道塗尚叢棘塵尾  
坐談空搔首弄修飾酒具樗蒲戲諸君何自溺老夫執  
大義婆娑豈安息彈血酒中原顧盼壯心激恨不登天  
門八溟奮羽翼金甌倘可擊運掌有如甃

溫太真嶠

勤王

逸民論崇有夷甫好清談何物誤蒼生虛名徒沾沾昔  
人執鄙吝流品非所慚人臣志王室建節當不凡往從



劉太尉蹇難相針砭立功向河朔延譽歸江南跋扈一  
將軍虎視常耿耿履尾幸不啞拔舌誠何堪渠魁已剪  
滅草竊敢勾尖投袂起馳檄惟子馬首瞻廳忽義旗指  
遂解京師嚴方與諸公飲揮塵垂疎簾

葛稚川洪

遊仙

五鼎非不豐不如鍊丹藥千乘非不榮不如駕黃鶴立  
功盜賊中高謝通侯爵願採勾漏砂還躡羅浮屨三疊  
舞琴心五炁司寶鑰吾祖有遺風閨房亦同學庶辭下  
上氛永享鈞天樂身隱焉用文猶龍訓懷樸

謝安石安

東山

神州已陸沉江左如飄瓦區區石頭城猶共王與馬簪  
纓何赫奕裙屐亦閒雅好爵非不榮鄙志在丘野夙愛  
上虞山移來白門下賭墅戲圍棋子弟酬杯筯有時攜  
伎人絲竹賴陶寫豈不念蒼生新亭淚空洒滔滔大江  
流誰與濟川者

桓子野伊

聞歌

人生奈何許一往有深情當此明月夜忽聞清歌聲始  
爲江南弄變作隴西行音節何忼慨低昂自相生停雲  
正徘徊飛鳥不能鳴借問歌者誰無乃古秦青聲本無  
哀樂愁者難爲聽我亦吹長笛因之搗哀箏怨詩唱未

畢流涕以縱橫

顧長康愷之 寫畫

他人爲我言癡黠各得半虎頭何足怖蟬葉乃堪玩妙  
畫如登仙變化凌雲漢遙望城樓霞丹青未能換傳神  
阿堵中相逢但驚盼大矣金粟身應作如是觀

孟萬年嘉 登高

志士多苦辛達人常逸豫涉世騁功名祇取百憂聚何  
如率我真深得酒中趣託戎馬間曠然見清素俯仰  
高山巔逍遙有餘步涼風西北來吹帽落何處形骸本  
不關冠屨又安附手折茱萸花啣杯自箕踞任爾座客

嚙去矣終不顧

宗少文炳

回壁

向禽五嶽遊不知何方住獨處環堵中苦無濟勝具妙  
画笔有神丘壑自奔赴氣象雖萬千歛之歸毫素懸著  
四壁間颯沓生風雨悠然彈玉琴如與衆山語幽澗答  
清音鳴禽起芳樹坐對不厭煩臥遊亦能去明月出前  
林微識岡頭路

袁景倩絮

廟志

吾家右衛率躬櫻商臣逆我生遭百罹亦當桂陽厄扶  
曳入殿廷志在衽金革素乏經世材簡淡畏繁劇忝竊

令僕任高臥謝賓客造竹每長嘯對酒聊自適庶免金  
罌賜知幾介於石但問心若爲此身容足惜笑彼黃羅  
翁鬚髯空似戟

陶通明弘景

隱居

白雲何達達山南亘山北幽人偕與閒往來成相識勾  
曲盡三峰地腑通靈域結廬良常阿采芝充朝食回望  
神虎門抽簪謝階級宰相非不榮隱居供我職夢寐松  
風間十賚踰三錫庶獲玉簡書繡衣告金冊

支道林遜

說法

野鶴有高姿刷羽雲霄近騏驥志千里所重在神駿格

物見道存觀心得靈運莫繪虛空圖但持卽色論恒覽  
南華篇漁父動清典諸賢互發覆宗風齊以振西山景  
日佳泉石愜幽性扶杖萬壑間庶幾嘉我邁